

Guna pengangkutan awam, kurang kadar kemalangan

KUALA LUMPUR - Op Selamat yang diadakan pada setiap musim perayaan dianggap berjaya mencapai matlamat untuk mengurangkan kadar kemalangan jalan raya daripada terus meningkat namun pengguna disaran beralih kepada pengangkutan awam yang lebih selamat.

Pengarah Eksekutif Safe Kids Malaysia, Jabatan Kesihatan Komuniti, Fakulti Perubatan dan Sains Kesihatan, Universiti Putra Malaysia, Prof Madya Dr. Kulanthayan K.C. Mani berkata, pada masa sama pengguna jalan

raya perlu bekerjasama memastikan angka kematian dikurangkan ke tahap paling rendah.

“Pertama jika mereka dapat berpindah kepada pengangkutan awam adalah lebih baik. Pengangkutan awam memang cukup selamat berbanding pengangkutan persendirian. Kedua, bagi mereka yang menggunakan kereta, kelajuan kenderaan perlu dikurangkan,” katanya dalam program *Ruang Bicara* di Bernama News Channel di sini kelmarin.

Menurutnya, apabila kelajuan kenderaan dikurangkan,

peluang untuk mengawal kenderaan lebih baik, kemalangan boleh dikurangkan dan kadar kematian dapat dikurangkan.

Katanya, kadar kemalangan maut yang paling tinggi melibatkan motosikal diikuti dengan kereta. Dua kumpulan ini saja sudah mencapai lebih daripada 80 peratus angka kematian. Jadi penunggang motosikal yang paling berisiko tinggi.

“Jika dua kumpulan ini dapat kita pindahkan sedikit kepada pengangkutan awam, saya rasa kita dapat menangani isu ini,” jelasnya.